

書叢本基學國

志雜書讀

(中)

著孫念王

行發館書印務商

書叢本基學國

志 雜 書 讀

(中)

著 孫 念 王

行發館書印務商

讀書雜志

漢書第十五

西域傳

三百餘里 三百里

蒲昌海一名鹽澤者也去玉門陽關三百餘里廣袤三百里戴先生水地記曰玉門關在故壽昌縣西百一十八里陽關在縣西六里壽昌本漢龍勒縣地今安西府西百五十里有壽昌城鹽澤去玉門千三百餘里前後書皆脫去千字念孫謹案郭璞西山經注及爾雅音義引漢書見釋文皆無千字蓋後人據漢書刪之也漢紀孝武紀作去陽關三千餘里卽千三百餘里之誤水經河水注作東去玉門陽關一千三百里以二書考之則漢書原有千字明矣又案廣袤三百里本作廣袤三四百里謂澤之廣袤不能知其確數大約在三四百里之間也水經注無四字亦後人據漢書刪之太平御覽地部三十七引水經注作廣輪四百里又脫去三字然據此知水經注原有四字也漢紀作廣長三四百里西山經注及通典州郡四竝作廣袤三四百里郭璞爾雅音義引漢書作廣輪三四百里禹貢正義及史記大宛傳正義爾雅釋水疏竝引作廣袤三四百里則今本脫去四字明矣

焉耆

北道西踰葱領則出大宛康居奄蔡焉耆念孫案景祐本無耆字是也焉字絕句焉下耆字則後人妄加之也大宛康居奄蔡皆在葱領之西自都護治所西至大宛四千三十一里至康居五千五百五十里又自康居西北至奄蔡可二千里並見下文故曰西踰葱領出大宛康居奄蔡也若焉耆則在葱領之東且在都護治所之東北四百里亦見下文豈得云西踰葱領出焉耆乎漢紀孝武紀後漢書西域傳通典邊防七焉下皆有耆字此後人依誤本漢書加之耳通鑑漢紀十二無耆字與景祐本同則北宋本尙未誤也故知諸書內耆字皆後人所加

得職

自貳師將軍伐大宛之後西域震懼多遣使來貢獻漢使西域者益得職師古曰賞其勤勞皆得拜職也胡三省曰顏說非也此言漢使入西域諸國不敢輕忽爲得其職耳得職者不失其職也念孫案胡解職字亦未了職非職事之職職猶所也言自大宛王以殺漢使見誅西域諸國皆不敢輕忽漢使故漢之使西域者皆得其所也哀十六年左傳克則爲卿不克則烹固其所也史記伍子胥傳作固其職也是職與所同義景紀曰令亡罪者失職武紀曰有冤失職使者以聞宣紀曰其加賜鰥寡孤獨高年帛毋令失職管子明法解篇曰孤寡老弱不失其職失職皆謂失所也故得所亦謂之得職趙廣漢傳曰廣漢爲京兆

尹廉明威制豪彊小民得職師古彼注曰得職各得其常所也是其證高五王傳朱虛侯章忿劉氏不得其職

孔道

婼羌國辟在西南不當孔道師古曰辟讀曰僻孔道者穿山險而爲道猶今言穴徑耳念孫案師古之說甚迂孔道猶言大道謂其國僻在西南不當大道也老子道經孔德之容河上公注曰孔大也太玄表次五曰孔道夷如蹊路微如孔字亦作空張騫傳樓蘭姑師小國當空道是也說文曰孔通也故大道亦謂之通道今俗語猶云通衢大道矣

山國 脫四字

鄯善國王治扞尼城西北去都護治所千七百八十五里至山國千三百六十五里西北至車師千八百九十里念孫案山國當作墨山國寫者脫墨字耳漢紀及後漢書西域傳作山國皆後人依顏本漢書改之水經河水注曰扞泥城西北去烏壘千七百八十五里治烏壘城至墨山國千八百六十五里本傳上文云都護三未知西北去車師千八百九十里皆本此傳墨山山名也因以爲國名若但云山國則不知爲何山矣而師古云此國山居故名山國則曲爲之說也又下文山國王西至尉犁二百四十里山國亦當作墨山國墨山國王下當有治墨山城四字水經注曰墨山國治墨山城西至尉犁二百四十里亦本此傳是國與城皆以墨山得名墨山國王治墨山城猶上文之皮山國王治皮山城也寫者脫去墨字及治墨山城

四字而師古遂云常在山下居不爲城治也亦是曲說

依耐國王治 難兜國王治

依耐國王治念孫案上文皆言某國王治某城此依耐國王治下不言某城者闕文也下文難兜國王治同

盧城

無雷國王治盧城念孫案此本作無雷國王治無雷城猶之且末國王治且末城精絕國王治精絕城也
隸書盧字作靈其上半與雷相似故雷譌作盧周官職方氏其浸盧維鄭注又脫無字耳太平御覽四夷部十八引此正作無雷城

好治食

織罽刺文繡好治食念孫案治食二字義無所取通典邊防八治作理避高宗漢書已誤作治漢紀作好酒食是也下文大宛俗耆酒義與此同今本酒作治者涉上文治園田治宮室而誤

市列

有金銀銅錫以爲器市列通典同念孫案市列上脫有字則文不成義漢紀作有市肆肆卽列也

後軍侯趙德使屬賓與陰末赴相失。陰末赴鎖琅當德殺副已下七十餘人。念孫案琅當上本無鎖字。乃後人誤取注文加之也。古者以鐵連環係罪人。謂之琅當。說文作鎖鎗。云瑣也。瑣古鎖字。琅當德即鎖德也。故師古云。琅當長鎖也。不得又於琅當上加鎖字。又王莽傳以鐵鎖琅當其頸。鎖字亦後人所加。琅當其頸。卽鎖其頸。不得又加鎖字。太平御覽刑法部十引王莽傳有鎖字。則所見本已誤。白帖四十五引作以鐵琅當其頸。無鎖字。

所以爲

凡中國所以爲通厚蠻夷。應快其求者爲壞比而爲寇也。念孫案上爲字涉下爲字而衍。

悔過來

前親逆節惡棄西域。故絕而不通。今悔過來。念孫案悔過來。本作悔過來順。順字與上文逆字相應。而今本脫之。則語意不完。通鑑漢紀二十二已與今本同。後漢書西域傳注引此正作悔過來順。

大馬爵

安息國有大馬爵。念孫案爵上亦有大字。而今本脫之。則爲不詞矣。太平御覽四夷部十四引此正作有大馬大爵。漢紀孝武紀通典邊防八竝同。

書革

書革旁行爲書記。念孫案上書字本作畫。胡謂畫革爲字而旁行之以爲書記也。師古曰：今西方胡國及南方林邑之徒，書皆橫行不直下。此是釋旁行爲書記五字非釋書革也。今作書革者，卽涉下文書記而誤。漢紀通典作書革，皆後人以誤本漢書改之。史記大宛傳作畫革，索隱曰：畫音獲。引韋昭漢書注爲解，不言漢書作書革也。太宰御覽四夷部十四引漢書正作畫革。水經河水注同。

月氏

老上單于殺月氏以其頭爲飲器。念孫案月氏下脫王字，當依張騫傳補。

皆絲漆

其地皆絲漆。不知鑄鐵器。念孫案皆本作無。無絲漆。不知鑄鐵器。皆言其與中國異也。今作其地皆絲漆者，涉上文其人皆深目而誤。通典邊防八正作無絲漆。

相接

東與匈奴。西北與康居。西與大宛。南與城郭諸國相接。念孫案相字後人所加。此傳凡言某國與某國接者，接上皆無相字。則此亦當然。漢紀孝武紀通典邊防八竝作南與城郭諸國接無相字。

以肉爲食

穹廬爲室。兮旃爲牆。以肉爲食。兮酪爲漿。念孫案肉上本無以字。後人以上下文皆八字爲句。而此句獨

少一字故加以字耳不知穹廬爲室旃爲牆肉爲食酪爲漿皆相對爲文不得獨於肉上加以字也太平御覽樂部八所引已誤北堂書鈔樂部二藝文類聚樂部三文選荅蘇武書注所引皆無以字

采繪

賜金二十斤采繪念孫案下文賜姑莫匿等金人二十斤繪三百匹則此文采繪下亦當有匹數而今本脫之也

烏孫男女

公主與烏孫男女三人俱來至京師念孫案烏字涉上下文烏孫而衍孫男女三人者公主之孫男孫女共三人也孫上不當有烏字下文公主卒三孫留守墳墓是其證漢紀有烏字亦後人依誤本漢書加之太平御覽禮儀部三十二引此無烏字

不可乏

食宜給足不可乏念孫案此承上文而言既有美田可以種穀又以錐刀黃金采繪易穀於他國則食宜給足不乏也不乏二字之間不當有可字此涉上文可以易穀而衍日知錄云不可乏當作可不乏非也既言宜給足又言可不乏則文義重複

匈奴困敗

易之卦得大過爻在九五匈奴困敗通典邊防七同念孫案匈奴上有曰字今本脫之則文義不明曰者衆人之言也大過九五象傳曰枯楊生華何可久也故衆人皆曰匈奴必困敗矣漢紀孝武紀有曰字

卦諸將

卦諸將貳師最吉通典同師古曰上遣諸將而於卦中貳師最吉也念孫案師古所說於文義不順卦當作卜言卜諸將孰吉則貳師最吉也下文云卜漢軍一將不吉卽其證今作卦者涉上下文卦字而誤漢紀正作卜

狐胡 車師柳谷

狐胡國王治車師柳谷念孫案國名無上下二字同音者狐胡當依太平御覽所引作孤胡四夷部十八字之誤也孤胡龜茲皆國名之疊韻者龜茲應劭音邱慈案古讀邱如欺又案孤胡與車師異地不當云治車師柳谷師字蓋涉下文車師而衍御覽作治車師柳谷無師字

表河曲

迺表河曲列四郡念孫案曲當爲西字之誤也武帝所開四郡武威張掖酒泉敦煌皆在河西故云表河西列四郡食貨志云初置張掖酒泉郡而上郡朔方西河河西開田官斥塞卒六十萬人戍田之霍去病傳云開河西酒泉之地後漢書西羌傳云武帝開河西列置四郡皆其證四郡非在河曲中不得言表河曲也漢紀

孝武紀作河曲。乃後人以誤本漢書改之。通典邊防八。太平御覽四夷部十三。引此贊並作河西。

犀布

故能睹犀布璫瑁。則建珠崖七郡。念孫案犀布連文。殊爲不類。布當爲象。象布二字篆文下半相似。故象譌作布。犀象璫瑁皆兩粵所產。故曰睹犀象璫瑁。則建珠崖七郡也。下文云。明珠文甲通犀翠羽之珍。鉅象師子猛犬大雀之羣。正與此犀象璫瑁相應。則當作象明矣。太平御覽珍寶部六。引此已誤作犀布。漢紀孝武紀。通典邊防八。引此竝作犀象。

外戚傳

適

適稱皇后。師古曰：適，讀曰嫡。念孫案此文本作正適稱皇后。後人以適卽是正。故刪去正字。案大雅大明傳曰。紂殷之正適也。初學記儲宮部引白虎通義曰。周以天子之正嫡爲王后。秦稱皇后。漢因之。是古書多以正適連文。後漢書皇后紀注。班固傳注。文選西都賦注。後漢書皇后紀論注。藝文類聚后妃部。初學記中宮部。太平御覽皇親部一及十一。引此竝作正適稱皇后。通典職官十六同。

充依視千石 良人視八百石

八子視千石。充依視千石。念孫案充依不當與八子同視千石。當依漢紀作充依視九百石。此涉上千石。

而誤。文選注太平御覽引此皆誤。又下文七子視八百石。良人視八百石案良人亦不當與七子同視八百石。當依漢紀作良人視七百石。此亦涉上八百石而誤。御覽引此亦誤。文選注引此正作視七百石。

誅之

乃召趙王誅之。念孫案誅之上有欲字。而今本脫之。則文義不明。此時趙王尙未至。不得遽言誅之也。太平御覽皇親部二引此正作欲誅之。漢紀同。

脫三字

孝惠張皇后宣平侯敖尙帝姊魯元公主有女。念孫案此文本作孝惠張皇后宣平侯敖女也。敖尙帝姊魯元公主有女。今本脫女也。敖三字。則上下文義不貫。此因兩敖字相亂而脫去三字。太平御覽皇親部二引此有女也。敖三字。又皇親部十一人事部百三十五引首二句。皆有女也二字。

卽爲所爲

大后安能殺吾母而名我。我壯卽爲所爲。師古曰。爲其所爲。謂所生之母也。竝音于僞反。念孫案兩爲字。皆讀平聲。爲所爲者。謂爲變也。爲變者。殺呂后以報母仇也。故下文云。大后恐其作亂。史記作我壯卽爲變。尤其明證矣。若讀爲爲去聲。而云爲所生之母。則詞不達意。

竇皇后親蚤卒葬觀津師古曰觀津清河之縣也念孫案地理志觀津屬信都不屬清河逃匿

女逃匿念孫案逃匿下有牀下二字而今本脫之太平御覽封建部五引此正作女逃匿牀下續史記外戚世家亦云女亡匿內中牀下

吐棄我意

今見我毀壞顏色非故必畏惡句吐棄我意句尙肯復追思閔錄其兄弟哉念孫案吐棄上有有字而今本脫之則文義不明太平御覽皇親部二引此正作有吐棄我意漢紀同

元始

元始三年生昭帝念孫案元始當依景祐本作大始

鉤弋

聞管堯十四月而生今鉤弋亦然念孫案鉤弋下原有子字上文云生昭帝號鉤弋子下文云鉤弋子年五六歲壯大多知皆其證今鉤弋子亦然對上句堯十四月而生言之下句云迺命其所生門曰堯母門其所生者鉤弋子所生也脫去子字則上下句皆不可通矣太平御覽皇親部二引此已脫子字漢紀孝武紀有子字

恐事急

後人有上書告諸醫侍疾無狀者皆收繫詔獄劾不道顯恐事急卽以狀具語光念孫案急上本無事字恐急者旣恐且急猶言惶遽耳言顯旣恐且急卽具以毒殺許后之事告光也霍光傳霍山謂顯曰聞民間謠言霍氏毒殺許皇后寧有是邪顯恐急卽具以實告文義正與此同後人不達而於急上加事字失其旨矣景祐本及漢紀孝宣紀通鑑漢紀十六皆無事字

署衍勿論

其後奏上署衍勿論李奇曰光題其奏也師古曰言之於帝故解釋耳光不自署也胡三省曰據霍光傳光薨後帝始聞毒許后事光於是時安敢言之於帝邪李說爲是

成君

旣使淳于衍陰殺許后顯因爲成君衣補治入宮具念孫案成君上脫女字則文義不明太平御覽引此正作女成君

禁闥局

應門閉兮禁闥局師古曰局短闌也念孫案局亦閉也淮南主術篇中局外閉亦以局閉對文

銅沓冒

切皆銅沓冒黃金塗師古曰切門限也沓冒其頭也念孫案冒字涉注文而衍景祐本無冒字是也冒卽沓也注訓沓爲冒則正文無冒字明矣後漢書班固傳注文選西都賦注藝文類聚居處部一太平御覽皇親部十引此皆無冒字漢紀及續列女傳亦無

不使

少主幼弱則大臣不使師古曰不使不可使從命也念孫案注說稍迂余謂爾雅曰使從也不使卽不從也管子小匡篇曰魯請爲關內之侯而桓公不使也史記龜策傳曰大將不彊卒不使令春秋繁露五行相勝篇曰將帥不親士卒不使不使皆謂不從

妬媚

誣汙先帝傾惑之過成結寵妾妬媚之誅念孫案妬媚二字義不相屬媚當爲媚鄭注大學云媚妬也五行志桓有妬媚之心史記五宗世家王后以妬媚不常侍病蹠布傳贊妬媚生患皆其證隸書眉或作眉見漢涼州刺史魏元丕碑與冒相似故書傳中媚字或譌作媚顏氏家訓已辨之

富平侯家

成帝每微行出常與張放俱而稱富平侯家念孫案家下當有人字富平侯卽張放故帝與放俱而稱富平侯家人也脫去人字則文義不明五行志正作稱富平侯家人

六人

鄭氏傳氏侯者凡六人。念孫案六當爲四。此涉下文六人而誤四人者。一傳喜。二傳晏。三傳商。四鄭業也。
並見上文五行志注。引此正作四人。

元后傳

西白虎

土山漸臺。西白虎。宋祁曰。浙本西字上有象字。今本下譌作下念孫案。浙本是也。師古曰。皆放效天子之制也。放效二字。正釋象字。且此歌以四字爲句。脫去象字。則文義不明。而句法亦不協矣。下文曰。園中土山漸臺。似類白虎殿。似類亦象也。水經渭水注。文選西征賦注。太平御覽人事部一百六。引此皆作象西白虎。漢紀同。

戶青瑣

殿上赤墀。戶青瑣。念孫案。戶下原有下字。起土山立兩市。殿上赤墀。戶下青瑣。皆相對爲文。今本脫下字。則句法參差矣。藝文類聚產業部。太平御覽資產部七。引此皆有下字。

漢高祖

初漢高祖入咸陽。念孫案。高祖上不當有漢字。此涉下文漢傳國璽而衍。北堂書鈔儀飾部二。太平御覽

儀式部三引此皆無漢字。

飲酒食

大后至漢家正臘日獨與其左右相對飲酒食念孫案太平御覽服章部五引此食下有肉字於義爲長。

王莽傳

不嗣

書曰舜讓于德不嗣師古曰言舜自讓德薄不足以繼帝堯之事也念孫案不嗣本作不台古文尙書舜讓于德弗嗣今文作不怡漢書皆用今文故作不台史記五帝紀舜讓於德不憚徐廣曰今文尙書作不怡怡憚也又自序曰唐堯遜位虞舜不台皆用今文也文選典引有于德不台淵穆之讓李善曰尙書曰舜讓于德不嗣漢書音義韋昭曰古文台爲嗣後漢書班固傳注曰前書曰舜讓于德不台音義曰台讀曰嗣據此則二李所見漢書皆作不台師古依古文改台爲嗣而取僞孔傳以釋之不自知其圜鑿而方枘也。

俊儉

俊儉隆約以矯世俗師古曰俊退也引之曰俊儉與隆約對文則俊非退也俊讀爲遵遵循也謂循儉尙約以矯世俗之奢侈也遵與俊古字通爾雅曰遵循也方言曰俊循也集韻遂亦作俊故遵儉之爲俊儉。